



大明會典卷之一百二十一

兵部四

銓選四

官舍比試

內外襲替官舍比試。本部行移中軍都督府會同內外官於大教場內。令官舍跪聽。

聖諭畢。給事中點定對數。錦衣衛官校看守。每馳馬越一墻一溝。開弓發矢。凡三射畢。兩人相向。馳馬使鎗箭俱中。鎗不避。利便者。鳴鑼二聲。為雙收。一聲。為單收。不鳴者。為不中。查例施行。凡襲替官舍比試。洪武初。令應襲子弟。送都督

府比試。騎射間習。始許襲替。若年幼者。紀名。候長比試。然後襲替。○二十七年。令子弟未及二十歲者襲職。至年二十。乃比試。年及者。即與試。初試不中。襲職署事。食半俸。二年後再比。中者。食全俸。仍不中。降充軍。○永樂十年。令再比不中。仍食半俸。三試不中者。發充軍。別選子弟襲替。○弘治六年。令比試不中者。悉照永樂十年例施行。○隆慶三年。題准。比試馬箭外。加步箭九矢。如步箭中二矢。馬箭合式。雖文理稍通。亦准取上等。步箭中二矢。雖文理欠通。馬箭不中。

亦許取次等。如馬箭合式。而步箭不中。文理欠通。亦准取次等。將一等五名以前。附記將材簿內。量補提調把總員缺。其餘補各衛所掌印僉書等缺。次等。先行帶俸。撫按官酌量委用。下等不中者。與支半俸。候二年。起送覆比。再不中者。住支折俸。止許月支米一石。又二年。再比。三次不中者。革職充軍。別選子弟替職。

凡各處監比。嘉靖二十一年。議准。兩京衛所并在外都司。應襲人員。俱要素習弓馬。起送之時。各該衙門。試果熟間。方許給文赴部。如至大教

場比試。十名內有二名不中者。將各掌印官參提降罰。不中人員。查照舊例施行。○隆慶四年題准。行衛所備查應襲官舍。年既出幼。無分已未襲職。責令各衛所掌印官。逐月精其射藝。通行較閱。分別等第。各省則申呈各都司官。兩直隸則申呈各兵備道。嚴加稽查。務使騎射精閒。比試得中。方為稱職。如一衛有下等二員者。即將掌印官照例參問。○萬曆元年題准。比試不中。候及二年。例應再比。除北直隸。山東。山西。河南。遼東。照舊外。在南京各衛所。聽南京兵部。照

例會同南京中軍都督府。在雲南等十省。及南直隸衛所。類送御史。公同該都司。及各該守巡道。比試中式者。列為等第。即填原給號紙。用印鈐蓋。准其開俸。造冊繳部查考。不中者如例行。凡比試分新舊官。永樂初。令洪武三十一年。至三十五年。奉

天征討獲功陞職者為新官。子孫年十六。出幼襲替。免比試。三十一年以前者為舊官。子孫年十五。出幼襲替。俱比試。永樂元年以後獲功者。出幼比試。與舊官同。○嘉靖八年奏准。新舊官一體

比試

凡比試。有冠帶總旗以軍功陞署百戶者。景泰四年。令承襲照例比試。仍支總旗名糧。差操管事。

凡免比試者。洪武二十七年。令雲南土官襲替免比試。○正統十二年。令武職隸雲南都司者。依守備官例。就本處會官比試。○嘉靖十四年。題准襲替軍職。但經武舉中式者。通免送比。凡比試違限。正統間。令係無力者。違一年以上。住俸半年。二年以上。住俸一年。三年以上。住俸

止於二年半。不必遞加。○隆慶四年。題准新舊官舍。年未及二十。願比者。或襲替在部。許其徑自告比。或公差赴京。許其呈衛起送。一體比試。不願者。照舊例行。未及六十。子孫弟姪告替者。與大選官同比。違限五年之內者。照例住俸。五年之外。各計道路遠近。如南北直隸。湖廣。陝西。山東。山西。遼東。過限十二年。雲南。貴州。四川。廣東。廣西。福建。江西。浙江。過限十五年者。照新例革發。別選應襲之人承襲。凡武職自來不曾比試者。弘治十二年。令子孫

襲職俱住俸三年○正德六年議准。祖父一輩未比試者。子孫襲職住俸三年。二輩住俸四年。四輩以上止於五年。不必遞加。雖遇革不免。

凡比試引疾。五府官俱於該選月初十以後。二十以前各行奏請。照例將比試引疾緣由及奉過

欽依。如期送回。以便查審入選。

旗役陞用

併鎗附

總小旗補役。以併鎗勝負為陞降。遇有應併人役到部。照比試例。行移會官。於中軍都督府前監併。其分別勝負亦與比試同。

凡總小旗併鎗。洪武二十六年定。總小旗併鎗陞用。須憑各府照會開繳。當該衛所保結文狀到部。然後類寫具奏。請

旨准用。仍咨呈該府。行下各該衛所收補。或奉旨取用年深總旗除授。須自各衛取勘從軍脚色保結。呈送到部。仍審實來歷相同。具本引奏選用。其附選出榜抄榜。給憑催任。一如除授官員施行。○又定。總小旗缺。務選年深精壯勇敢軍人

小旗併鎗軍人併鎗得勝。陞小旗。小旗併鎗得勝。陞總旗。○二十八年。令異姓併鎗得勝者。授役年月。從本身始。不勝者。總旗子。降小旗。小旗子。降充軍。異姓者。不分總小旗名下。俱充軍。但不勝者。俱不許再併。○永樂二年。令總小旗兒男。關糧紀錄者。至十六歲。准出幼著役。○成化六年。令奉

天征討小旗。未經類引。獲功二級。該陞試百戶者。准未併鎗例。減一級。實授總旗。其本身獲功陞授者。不在此例。○弘治十三年。奏准。凡謀故殺死

總小旗者。就於犯人戶內。勾取壯丁。抵充軍數。其旗役。仍令本戶餘丁補當。○正德八年。奏准。各衛總小旗戶絕。即將名伍開除。不許義男女。壻外甥告補。○嘉靖十二年。題准。在京。在外。各都司衛所。將總小旗行拘到官。審取各役從軍立功陞旗。繼補併鎗備細。來歷親供。攢造文冊。內有老疾不堪應役之人。即將名伍開除。就令應該替役弟姪兒男。保送併鎗文冊。一年一次。依期造報。○二十七年。題准。陣亡總旗兒男。奉欽。依陞襲者。雖出十年之外。亦准併補。仍加陣亡一

級○又例。凡總小旗老疾亡故。親男幼小者。將弟姪等項收支軍糧。應役親男長壯。併鎗代補。如無親男。方許弟姪等項併補。○凡總小旗年老疾故。該嫡長子孫併補。如幼小殘疾。將次房子孫暫併旗役。因獲功陞授一級。應將祖父原役。退還嫡長子孫併補。其次房子孫功陞一級。照軍餘例。准充小旗。若祖總旗暫補之人。功陞百戶者。亦將總旗退還嫡長子孫。暫補之人。准充小旗。○凡民人犯事充軍。有功陞小旗。遇赦該放。不許放回。仍留原衛。

凡錦衣衛旗役。弘治十三年議准。錦衣衛總小旗犯一應行止。有虧罪名者。俱調衛充原役。○正德八年題准。錦衣衛旗役力士。如在逃一年之內。聽其首告。查無情弊。初犯准令復役。再犯調衛充軍。若一年之外。曾經攢造逃故。文冊清勾者。不許首告。聽原籍官司拘解。如正身病故。取該管官吏里老甘結。解戶丁補役。○十六年詔諸色人等冒認錦衣衛戶丁舍丁。致陞官旗者。限三箇月內。准自首免罪。止革去職役。過限不首者。事發治罪發遣。○又例。凡錦衣衛冠帶總

旗犯該徒罪以上。及教場點閘不到三次者革去冠帶。待有功之日。仍與冠帶一體加賞。○嘉靖四十二年題准。錦衣衛官除軍功世襲。

皇親廕授外。或冒籍充役。黃緣陞官。或京衛隨藩

乞

恩或奏帶陞官。或報捷填註。行本衛逐一清查。具奏裁革。○隆慶元年查革一百二十餘員。○二年查革四百三十餘員。又兵部節議查革一千一百一十五員。○萬曆八年議准革錦衣衛提督象房千百戶等官軍奴等役。其事務歸併本衛

○十三年題准。行錦衣衛掌印官查革該衛冗

冒官員

凡

王府護衛總小旗。洪武初令從

王所補授

凡太常寺犧牲所旗軍。但有過名。不分輕重。改調在京別衛。揀選無過之人補當。其為事立功。遇赦回衛者。亦調別衛。

凡各處監併。洪武二十五年。令總小旗亡故親男弟姪。及義男女婿。能併鎗者。俱准併。勝者補

原役。義男女婿。正德以後不准併。護衛總小旗併鎗免赴京。

雲貴四川兩廣從本都司官監併。後奏准福建

遼東陝西都司山西行都司俱照此例。○正統

二年奏准南京直隸衛所總小旗從守備及兵

部堂上官會併湖廣浙江江西山東河南萬全

山西大寧都司福建行都司中都留守司具由

申部轉行各司會同巡按按察司官監併四川

行都司所屬布按二司同本司正官監併。○成

化三年題准各衛所總小旗戶丁併鎗補役會

彼處鎮守撫按并布按二司官親詣監併四川

行都司建昌等六衛相離四川路遠及無鎮守

等官有總小旗戶丁曾經保申兵部准併鎗者

就令本處首領官會同本都司掌印官監併回

報。○六年令延綏等處守邊總小旗依湖廣等

處例申部轉行就本處會官監併

凡例免併鎗。洪武二十八年令陣亡失陷傷故

殘疾出海運糧覆沒者補役免併鎗。○永樂間

令奉

天征討有功者免併鎗一次。○正統十二年令凡陣

亡征傷殘疾旗役例免併鎗者以十年為率。若

替役十年之外。不經告明者。不准

凡功准併鎗。正統八年。令總旗代役。未併鎗。獲功一級。該陞試百戶者。以功准併鎗。補實授總旗。竒功一次。頭功二次。該陞實授百戶者。各除一級。准併鎗。陞試百戶。○十二年。令併鎗違限立功者。在立功限內。獲功一級。准免併。即與實授

凡併鎗違限。正統十二年。令應併鎗之人。違限十年。或年過三十。例該收軍者。發沿邊立功五年。滿日併補。○隆慶六年

詔總小旗併鎗。年及三十歲。十年外。人文不到部者。量照武職襲替例。南北直隸。湖廣。陝西。河南。山東。山西。遼東。俱限十二年之內。江西。浙江。廣東。廣西。福建。四川。雲南。貴州。俱限十五年之外。免其查革。此外再有耽延。不行告併者。方行革充軍役。○又例。凡總小旗弟。男子姪。父祖不曾併鎗者。係是隔輩。不准併鎗。革充軍役

土夷襲替

凡土官襲替。洪武二十七年。令土官無子。許弟襲。○三十年。令土官無子弟。而其妻或壻為夷

民信服者。許令一人襲。○永樂十五年。令土官告襲。雖出十年。亦准襲。○正統二年。奏准。土官應襲者。預為勘定。造冊在官。依次承襲。○弘治二年。令土官應襲子孫。年五歲以上者。勘定立案。年十五以上。許令襲。如年未及。暫令協同流官管事。○五年。令土官襲職後。習禮三月。回任管事。○嘉靖六年。奏准。土官襲替。及土舍年久。不得承襲者。鎮守撫按嚴督三司等官。從公作急勘明具奏。若展轉推託。及貪官作弊者。指實參究。○二十九年。題准。土舍襲替。查無違礙。即

與照例起送。年終。撫按鎮守官。將告襲土舍姓名。并行查年月日期緣由。經該官員職名。奏報。雖有陞遷。必待事完。呈請撫按衙門詳允。方許離任。如再故違。留難阻滯。展轉駁勘。致啓邊釁者。撫按指實參奏處治。

凡土官就彼襲替。天順八年。令土官告襲。勘明會奏。就彼冠帶。○嘉靖二年。令土官衙門。設在荒遠。兼因爭競。讐殺等項。不能赴京者。撫按等官。勘實代奏。就彼襲替。仍依先年戶部原擬等級。令其納穀備賑。○六年。奏准。地方有事。調遣。

鎮守撫按等官查明具奏。就被襲替。○十五年
議准。納穀冠帶土舍。曾經兵部題奉。

欽依者。不必再勘。其止曾納獲實收。未奉

欽命。本布政司徑劄冠帶者。備勘明白。免赴京。類具

供結。兵部查照。上請降給憑劄。方許實授管事。

其有不服起送。與擅自冠帶管事者。聽撫按從

重叅究革職。另取應襲之人。赴部襲職。○十八

年。令安南都統使子孫襲替。照土官例。聽鎮巡

官勘實具奏。就被承襲。○二十八年。題准。應襲

土舍。曾經調遣。効有功勞。暫免赴京。就被冠帶

署職。管束夷民。待後功勞顯著。方許實授。其餘

不曾調遣。及無功可錄者。照例起送赴京襲替。

各官授職之後。若能建立奇功。平定大盜。應合

重加賞賚。或

誥勅褒獎。如有驕縱違誤。征調愆期。聽鎮巡官臨

時議擬。奏請

明旨。遵奉施行。○三十三年。議准。雲貴土舍。應襲。令

照品納米。撫按查明具奏。就被襲替。○萬曆九

年。題准。停止雲貴土舍輸納事例。凡土司告襲。

所司作速勘明。具呈撫按覆實批允。布政司即

為代奏。該部題選。填憑轉給。就彼冠帶襲職。有願赴京親襲者聽。其效忠進獻馴象土物并疏奏聞。撫按仍設告襲文簿。將土舍告襲藩司代奏日期。登記明白。年終報部備考。

凡土官襲替禁例。弘治十三年奏准。土官襲替其通事把事人等。及各處逃流軍囚客人。撥置不該承襲之人。爭奪仇殺者。俱問發極邊煙瘴地面充軍。○嘉靖十年議准。各邊軍職及勘事人員。索取土夷財物。致生他變者。依激變良民律例。○十四年議准。雲南四川兩省土官各照

舊分管地方。如有不遵斷案。互相仇殺。及借兵助惡。殘害軍民。并經斷未久。輒復奏擾變亂者。土官子孫。不許承襲。所爭村寨。平毀入官。仍追究主使。扛幫教唆。積年通把人役。問以重罪。○三十三年題准。土官土舍嫁娶。止許本境本類。不許越省。并與外夷交結。往來遺害地方。每季兵備道取具重甘結狀。如再故違。聽撫按官從實具奏。兵部查究。量情輕重。或削奪官階。或革職閒住。子孫永不許承襲。凡夷人襲替。洪武永樂間。降附達官。上故者。子

孫襲替降一級○正統間令海西建州等女直襲替授職二十五年陞一級各降陞例今俱不行○成化間令達官襲替免降新遷安插者許就衛所襲替係流官者仍減襲其海西等女直襲替乞陞不拘父子但乞一次者不許再乞○弘治六年令海西等夷人告襲者查原贖

勅書除天順以前陞授職事俱仍舊成化以後乞陞者都指揮行大通事勘明即與襲替都督仍行鎮巡等官勘奏定奪○凡哈密等處使臣求襲父職者查有原降

誥勅照例襲替換給其餘外夷乞討官封俱臨時奏請定奪○嘉靖元年題准達官承襲照土官例不拘十年之限○十一年題准夷人襲授等項照禮部奏行事理附入朝貢數內方准襲授不許違例將朝貢襲授各起夷人混入赴京○又例凡夷人奏係二十五年之上例應陞級者會同譯審明白行巡撫衙門勘結授職二十五年之內果無犯邊情弊年數相應連人咨報有礙者徑自阻回○凡來降夷人有職事者與原舊職事子孫准襲無職事者量與做頭目子孫

襲替之日收軍。後能立軍功陞職者。照軍人獲功例。准襲。其不由軍功。別項陞者。子孫襲替。革與頭目差操。○十二年議准。女直夷人襲替。譯審辯勘明白。兵部具揭帖。赴

內閣查對原

勅底簿無異。就與襲替。其都指揮有功。討陞都督。譯審果係正身。及無搶冒等項情弊。行巡撫衙門勘果。應陞。連人咨報奏請。若或有礙。就彼省諭阻回。○又例。凡海西建州朶顏三衛女直。求討襲替。若所管部落。累曾犯邊。本人懦弱不堪。

襲替管事。革去討陞職事。所授職事。遞降一級。左右都督以下。量減一級承襲。俱換給

勅書。齎捧回還。管束部落。照例進貢。曾討陞一次者。不許再討。若能將本邊夷人。及漢人逃去。本地擒拏。及被擄漢人。送到守邊將官處。亦許鎮巡等官具奏。量加陞賞。仍令鎮巡等官。將前項事情。撮其大要。譯寫番文。用總兵官印信。每都督。給與一張。令知勸懲。

凡夷人

勅書。成化十四年。革夷人襲陞總勅。另給分勅。○

嘉靖中例。夷人奏有總勅。要行分給襲替者。行
巡撫衙門查明咨報。照例奏請分給。各夷有奏
稱原授

勅書被搶。及遭水火等項無存者。若係成化年間
招撫之數。譯審查對明白。仍行巡撫衙門查勘
無礙。咨結前來。議擬上請。不係招撫之數。毋得
一槩混同奏擾。○凡夷人併繳

勅書。如無搶冒洗改情弊。行該邊巡撫衙門。勘審
咨報覆行。辨驗明白。不拘所繳多寡。俱於原授
職事上量陞一級。若不係同衛同族。及尊幼未

曾絕嗣。恃強搶奪。改洗希圖陞職者。止與原授
職事。其併繳

勅書。譯令齎帶回寨。交還本夷收領。○十二年題
准。凡來貢夷人。齎有年遠舊勅。例應換給者。巡
撫譯驗真正。明白開寫何等舊勅。連人咨部。查
議定奪。如有那移搶奪不明情弊。徑自阻回

大明會典卷之一百二十一

大明會典卷之一百二十二

兵部五

優給優養附

國初南京設故官營。凡故官子孫妻女皆送入優給。後乃分子孫應襲。年未及者曰優給。子孫廢疾故絕。止遺母若妻若女。及年老無承襲者曰優養。

凡優給優養總例。洪武四年定。軍職陣亡。無子弟而有父母若妻者。給全俸。三年後。給半俸。有子弟而年幼者亦同。候襲職。給半俸。有特旨令其子孫參隨歷練。及未授職者。給半俸。其病

故無子弟而有父母若妻者給半俸終身。有子弟年幼者初年給半俸次年又半之。俟襲職給本俸。

特旨參隨及未授職者亦給半俸。軍士陣亡有妻者月糧全給。三年後守節無依者月給米六斗終身。病故有妻者初年全給次年總小旗月給米六斗。軍士給月糧一半。守節者給終身。將士守禦城池戰沒病故妻子無依者守禦官計其家屬有司給行糧送至京優給。願還鄉者亦給糧送回。願留見處者依例優給。○二十六年定軍

官亡故遺下嫡長子女年未出幼或母年老或無嫡子嫡孫次及庶子或弟或姪合得優給養贍者須憑各衛保結起送到部審取故官從軍脚色一體委官齎赴

內府比對貼黃相同具奏如是奉

旨欽與優給隨即於

御前附寫欽與優給文簿扣算出幼年分明白開寫歲數至某年住支或奉

特旨陞等優給及流官特與世襲亦須隨即明白注寫通行抄出緣由立案行移錦衣衛作數放支

其征進陣亡傷故病故總小旗兒男一體引奏定奪○二十七年重定凡武臣在任亡故及征傷失陷者自指揮至鎮撫妻並給米五石終身無子孫者亦如之為事亡故無承襲者不給近例不○正統十四年令優給優養官願回原籍或南京者俸糧隨所在官司關支願在京者俱折銀布○景泰二年令口外官願留在京優給優養者俱於後軍都督府帶管

凡優給軍職病故并年老應襲子孫幼小俱入大選全俸優給舊官十四歲住支新官十五歲住支若以優給而故者以次應襲之人轉名優

給○永樂元年令奉

天征討陣亡官員幼男送錦衣衛優給總小旗幼男錦衣衛食糧出幼原衛補役其雜犯為事亡故并典刑之子俱照祖職與全俸優給在外優給官舍婦女有親可依不願赴京者俸糧照例於所在支給○正統七年令武職子弟優給但在父兄沒後十年內曾告衛者行勘雖出十年亦准十年外告者不准○成化五年令世襲官陣亡其子幼小合陞流官者依該陞俸優給流官

病故其子止給世襲俸○弘治十年令舊官為失機等事問發未復職者子孫優給與半俸○嘉靖十一年議准軍職子孫優給若父祖犯該充軍及犯該雜犯死罪問發立功年限未滿而死者俱與半俸其餘全俸充軍子孫例前與全俸優給未曾出幼者照例改支半俸○三十年議准調衛病故子孫年幼許令原衛暫與優給候出幼襲職仍去原調衛所○又議准各邊陣亡。

特旨廕子而年幼者照所廕官與全俸優給加以冠帶候出幼呈詳撫按就彼授職免其赴京○又例凡遜官非犯徒罪以上問革為民不知去向三年子孫亦許優給○凡祖父未經比試例該罰俸者子孫仍與全俸優給待其出幼方行罰俸○又例總旗陣亡其子陞與試百戶俸優給凡優養洪武六年令武官殘疾者月給米三石優養十年有子准承襲無子為民○二十年令京衛官老疾無子孫者全俸優養已襲替而故再無承襲者亦同○成化七年令戶絕官優養不分新舊母女俱月支米五石妻二石母妻終

身。女。係新官者。出嫁住支。係舊官者。十四歲住支。犯姦及改節者。不准。○弘治四年題准。流官患病。照原襲祖職優養。○七年。令武職故絕。有親叔年老。不堪承襲者。仍月支米三石優養。待十年無子。照例為民。○十年。令武職年老。戶無承襲者。支全俸優養。入大選。應襲人殘疾者。舊官依洪武六年例。新官給全俸。入大選。不限年。歲。母女支優養者。新舊官俱入大選。妻不准。繼母與孀優養。視妻例。月支米二石。若武職故。其子優給亦故。戶無次丁者。其母止作故官妻。月

支米二石優養。○正德二年奏准。軍職故絕。遺所生女殘疾。不能適人。願守父墳。靈者。月給米一石終身。○又例。凡軍職故絕。雖使女所生女及故官生母。雖非父正妻。亦各月給米一石終身。○嘉靖六年奏准。各衛故官優養親母親女。月支米五石者。給本色米二石。折色三石。內一石。折銀二錢五分。二石。折鈔四十貫。○十年題准。軍職繼妻。照正妻例優養。○三十二年議准。軍職年不及六十者。查無殘疾。不准優養。○又例。應襲舍人病故。其妻月給米一石優養。有就

科貢出身。歷官後故絕遺下妻女。亦照武職例優養。○凡軍職并舍人故絕遺下母妻等項。例諛優養者。雖病故。係十年之外。比與授職兒男不同。保勘無礙。俱准優養。○萬曆十二年題准。舊官仍給全俸優養。殘疾舍人。未犯罪名。月支米三石優養。候身終日住支。

凡大漢將軍試百戶。老疾無替役者。弘治八年奏准。放回優養。仍免戶男一丁雜差。

凡達官病故。無應襲而有正妻者。天順元年。令月支米一石。優養終身。○成化三年。奏准。達旗人等故絕遺有母妻。亦如前例。凡來降夷目。景泰三年。令歿於王事兒男幼小者。准紀錄。月給養贍米二石。候出幼著役。其在京病故者。亦准紀錄。月給米一石。

貼黃

國初置軍職黃簿。以便稽考。永樂後。委官清理事例甚詳。按職掌。有缺官條。今不行。其更名復姓附焉。

洪武二十六年。定寫黃績黃例。凡除官開寫年籍。從軍脚色。赴

內府清理明白寫黃。仍寫內外貼黃與正黃關防走號合同。請寶鈴記。正黃送銅櫃收貯。內外黃各置文簿附貼。亦於

內府收掌。遇有陞調襲替官員。次日即具陞轉襲替緣由奏聞。貼揭續附。如有事故亦須總為置簿。揭下附貼以憑稽考。○永樂以後續定清黃例。凡武職除授後有陞調襲替及降調減革等項。每三歲一次清理。以兵部侍郎一員。總其事。都御史一員。主糾察。翰林官一員。主編纂。兵部仍委主事一員管理。取撥監生辦事官吏供用。

將清黃之歲預行在京衛所。在外各都司衛所。令各具親供申部。以憑清理。○一取送到各官親供。類見都司衛所抄出所供緊關大畧。將類進貼黃舊冊。照名挨查。如貼黃有名與今供脚色相同者。銷作重名。其不同者。騰出。○一取騰出親供於歷年征克冊內。查所供征克地方。於誥勅簿內。查所供受過

誥勅。於選簿及陞除冊內。查所供除授年月職事。仍將舊貼黃對款通查。供報明白者。照例繕寫。若有漏報父兄本身舊名及調守衛所從軍征

克地方年月不同。或給授

誥勅。不供流官世襲者。依舊貼黃添改。有供除授職名。與原除日期不同者。依選簿陞除冊改正。若親供詳細。而貼黃不開。或親供流官。而貼黃作世襲。親供調權試職。而貼黃作流官。或貼黃歸附年深。而親供年淺之類。並依親供寫黃。○一若有詐冒情弊。或以流官作世襲。試職署職作實授。或應襲一輩。而冒襲二輩。或應減革。而未經減革。或總小旗妄引事例。未經併鎗。或調守衛所年月。空歇不明等項。難以寫黃者。俱駁

出。造冊照問。俟繳報另行。○一各官繳到回報

照問脚色。須將原照問總冊查對。如回稱拘收

誥勅者。須開是何年月衛所拘收。給還

誥勅係千戶者。須開寫正副。稱父及伯叔兄弟者。須開各人姓名。稱病故者。須開本官有無子孫承襲。合拘收

誥勅者。須開本官父祖姓名。衛所職事。

誥勅道數字號。以憑燒燬。有重受

誥勅。須開曾無燒燬拘收緣故。凡查對明白。然後寫黃。○一寫大黃。備開脚色。凡姓名。舊名。年甲。

貫址。從軍歸附來歷。征克地方。殺獲次數。受賞名目。陞授職役。調守衛所。并給授

誥勅。俱要細開。仍每姓類作一處分寫。或係達官。另行類出。每寫一官。後空白六行。以備續附。寫畢。仍將各姓。見任官父祖脚色。與類姓舊冊通查。有相同者。銷作重名。止將見任襲替緣由。續附。若與見任官同者。亦銷作重名。如陞調止將陞調緣由。續附。凡供殺獲人馬。非親手者。不許開寫。更名復姓者。依今改姓名。寫黃○一小黃。止存從軍歸附征克緊要地方。并衛所流世襲

事。總集開寫二本。一為內黃。一為外黃。其紙式。指揮千百戶大小不等。每寫一官。後各空半幅。以備續附。○一為事充軍抄沒。無承襲及義男女婿充總旗者。另行類姓。用白紙開寫。仍具事故緣由。○一寫畢。內外黃。依類姓資次。編寫字號。內黃左比。外黃右比。凡編號。用武字。編訖。仍分類都司衛所。依式分貼。○一清理達官。貼黃。於達官總冊。選簿。并承勅郎。審過冊內。查對所供鄉貫舊職歸附起數。除授陞轉緣由。及有姓無姓。有姓者。仍舊。無姓者。類奏。

賜姓。依百家姓編排。其寫黃不類姓。止開某人下
來歸。其編號用達字。餘並與武官同。○一寫黃
後。將各起達官親供脚色。編寫勘合。與黃同進。
兵部用印鈐記。照例給散。○宣德十年。令軍職
貼黃。季報脚色文冊。本都司年終類奏。○嘉靖
三十三年題准。行續黃主事。於大選後。凡該續
武職。除內外相同准續外。其有內無外。有外無
內。中間脫落者。備查世次明白。即與註續。內外
俱無者。就與立黃。○又題准。軍職應該揭黃者。
每年終一次。通行各該衛所。但有為事革發。并

老幼故絕。官舍應該革黃者。即具供結。申呈各
都司。備細造冊。付進表官。解部查考。以後每年
一造。直隸并南京衛所。徑自申報兵部。在京衛
所。每季一報。該司編立文簿。挨次登簿。貯庫。候
揭黃之時。轉達該管主事。年終會同該科查揭。
差官燒毀。如有朦朧回報。及過限者。各都司衛
所官。查叅治罪。○近定查黃例。凡選簿。貯本司
冊庫。每選後。添寫一革。如黃內革數不全者。查
選簿。凡寶簿。欽陞簿。貯印綬監。與選簿同。如黃
選。殘缺者。請查寶簿。凡功次簿。貯本司冊庫。與

五府功次勘合底簿同。如黃選內功次欠明。查功次簿。功次簿殘缺。弔查五府勘合底簿。凡歲造貼黃。貯本司庫。如內外黃查對不獲。方查年遠。貼黃○又近例。舍人選官後。每員給號紙一張。將祖父歷功陞職緣由。襲替輩數。俱照黃選書其緊關節要。付本官收執。以後子孫襲替。同保結齎投本司。恐有黃選不備者。即據號紙所載。謄入審單。收選後。仍將襲替年月緣由。續填原號紙後。付照填滿。換給。如遇水火盜賊失去者。於本地方該管衛所。及有司衙門。告給執照。

待子孫襲替日。另行填給○萬曆六年題准。將清查過各黃。謄錄緊要畧節。約為冊籍二本。存留部科。以便稽查○十一年題准。凡遇清黃年分。行令各該衙門。將各官脚色。以立功之人為主。備開從軍充發來歷。得功陞官次數。世系支派。嫡庶長次。稱謂并事故襲替遇例。比例實授等項。月日。并近年獲功新陞官員。應世襲者。備寫明白。如旁枝異姓。及犯強盜不孝。敗倫犯姦。降級調衛等項。亦要從實開報。另造親供手冊。各一樣二本。依限送部○十二年題准。清黃事

例。行各巡撫責令都司將所屬衛所官除照常供冊外。另造總數花名文冊。俱付本年進表都司。順齎投部。聽司官查比。如地遠本年不能到。將本官職名註簿。另限催送完銷。違限參究。停其遷轉。管黃司官置立簿扇。督同監生將供冊詳查。如有隱年久為年淺。改借職為本職。一切含糊關係重大者。將各該衛所官不時參奏。止是差訛。完日查參。將承行吏照例提問。監生比對精詳者。量賞。仍定立程限。將應清黃數。折為三分。每年務完一分。三年內通完。○又題准。清

黃官員請鑄

欽降關防一顆。給發本官收用。將清黃簿。俱註本官職名於後。仍另謄青冊。即用關防鈐蓋。收貯該司。以後接管官。俱照此遵行。

凡武臣士卒。有欲復姓更名者。洪武十九年。令兵部具奏改正。○二十六年定。凡軍官或年幼過房乞養。今將本姓。或幼名。到部更改。必須明著緣由。奏聞准改。仍將改換緣由。續附貼黃。○永樂元年。令各衛韃靼人。同名無姓者。照洪武年間例。賜以姓氏。仍編置勘合。以備稽考。中國

人不得冒韃靼名。以避管事。違者治罪。○十一年。令新官義男女婿。例襲流官一次。不許出姓。有擅改姓名。詐冒承襲者。處極刑。首告者。給賞。○成化十八年。令清黃之年。將更名復姓官員。類造一冊。送。

內府備照

誥勅

武官給授

誥勅。按洪武中職掌所定。一品至五品。曰誥命。六品以下。曰。

勅命。其有應合給授者。須憑各官報到從軍脚色。比對內外貼黃年籍。并見授職事流世相同。然後奏聞。騰黃照品定奪。散官。寫誥給授。如犯法得罪。應合追奪到部。進送內府收貯。若充軍征進者。置簿編收。其典刑。及亡故無嗣者。會官燒毀。至今遵行。

凡武官階級

正一品

初授特進。禁祿大夫。

從一品

初授榮祿大夫。

正二品

初授光祿大夫。

初授金吾將軍。

從二品

初授鎮國將軍

陞授定國將軍

正三品

初授昭武將軍

陞授昭毅將軍

從三品

初授懷遠將軍

陞授定遠將軍

正四品

初授明威將軍

陞授宣威將軍

從四品

初授宣武將軍

陞授顯武將軍

正五品

初授武德將軍

陞授武節將軍

從五品

初授武畧將軍

陞授武毅將軍

正六品

初授昭信校尉

陞授承信校尉

從六品

初授忠顯校尉

陞授忠武校尉

凡續寫正統以後專差通政司官一員提督武

官

誥勅遇有襲職替職等項官員齎

誥前來告續者查對明白照例續寫類奏給還凡

已經給授者並依此例不許重給○近例每三

年兵部委官一員會同騰黃官及中書舍人將

內府節年見在收貯駁查未報

誥軸及各官造報未撰冊結通行清查明白開送

該司將各處送到貼黃文冊比對各官父祖從

軍立功陞職無差應請續者照例查撰奏送中

書舍人書寫如查無下落仍行該都司衛所責

委官員再行查勘○萬曆元年題准行各該巡撫衙門將所屬衛所請

誥續誥官員除因便赴京願由軍衛起文者聽其親齎赴部請續外其餘俱覈造功次歷履氏代總冊連原領

誥軸每春夏季終差人類齎赴部以憑轉送謄黃衙門查謄擬授兵部歲差官二員齎去散給

凡封贈洪武二十四年令凡武職父見任不封嫡繼母在生庶母不封再醮之婦不封嫡繼母已故所生母見在合照子職封嫡繼母及所

生母俱故止贈嫡母繼母在嫡母已故合封繼母贈嫡母兄從軍弟襲其職合封贈父母伯叔從軍姪代襲者係為人後合封贈伯叔父母襲祖職者止封贈本父母其致仕官陞除不與陞授止與原授凡試職官及弟男子姪并致仕官不授

誥有

特旨與者不在例其父祖原授官職大未經封贈今子孫見襲官職小該給

誥命其祖母并母俱依父祖原職封贈若父祖原

授官職小。今子孫見授官職大。其祖母并母俱依子孫職封贈。○二十六年定武職有功應封贈祖父母。父母。妻室者。照依

欽定資格。一品封贈三代。二品。三品封贈二代。四品以下。封贈一代。

正一品。至從六品。曾祖母。祖母。母。妻。各封贈夫人。職事對品封贈。

正從一品。曾祖母。祖母。母。妻。各封贈夫人。

正從二品。祖母。母。妻。各封贈夫人。

正從三品。祖母。母。妻。各封贈淑人。

正從四品。母。妻。各封贈恭人。

正從五品。母。妻。各封贈宜人。

正從六品。母。妻。各封贈安人。

○二十九年。令凡義男承襲義父官職。又隨義父姓者。當封贈義父母。若出姓者。不封贈。其親父母亦未得封贈。若本官以後自立功陞職者。許封贈親父母。若代義父總旗先鋒身役。後自立功得官。而尚隨義父姓者。封贈義父母。出姓者。封贈親父母。女壻承襲妻父職事者。封贈妻父母。若代妻父總小旗役。後自得官者。當封贈

父母○正統六年。令武官有廢疾。或年幼。其弟若叔替職者。兄姪終身無子。方得封妻。婦人夫與子俱有官。依文職例。從其高者封贈○正德八年議准。一凡伯叔父自己立功。故絕。本人係親姪。或聽繼為嗣。未聽繼為嗣。今襲職。止合封伯叔父母。若伯叔父襲祖職。故絕。本人曾聽繼為嗣。亦止合封贈伯叔父母。本身父母俱不得封贈。若伯叔父襲祖職。故絕。本人不曾立為嗣子。只以倫序應該承襲祖職者。各封贈本人父母○一兄立功授職。親弟襲職。封贈本身父母。

其妻不得授封。待傳之子。照姪襲伯叔事例。封贈伯叔父母。本身父母理無封贈。其有移已及妻之封於其父母者。聽○一軍職母祖母係再醮。母子無絕道。俱准授封○一武官生母見在。壓於嫡母。不得授封者。本官之妻。亦不得授封。若軍職緣事問革為民者。見在。本身及妻不得授封。待止後。方許授贈○一姪代伯叔總小旗役。以後自立軍功陞職者。以自己立功論。當封本生父母。其姪男襲替伯叔職。係為人後者。已及妻。照例封贈○一軍職除犯該強盜。妄保官

員揭黃罷職等項應該追奪

誥命照例不准外。其犯該人命失機不孝及竊盜
掏摸盜官畜產。白晝搶奪姦宿軍妻。行止有虧
敗倫傷化。賣放軍餘十名以上。充軍為民。或身
終。或年六十子孫襲替後。能立功陞職大於祖
職者。止得本身封贈。若父祖六十歲尚在。則本
身亦不授封。若充軍為民之人。復還原衛原職。
又自立功陞職者。亦不得封贈。○一武職由
恩廕傳乞報捷等項。致位通顯。雖無軍功。或先世姻
連

國家。或本身竭力王事。非如納銀等項陞級者。及
雖係納銀等項進身。能自立軍功三級以上者。
俱准給應得

誥命。其專以納銀等項進身。雖有軍功一二級。或
恩廕一二次者。不准給。若奉一時

特恩臨時奏請子孫襲替。不係軍功者。照例減革。○
嘉靖十一年題准。軍職有以妾作妻。冒受封

誥者。許令首官改正。免罪。若有欺隱。事發重治。○
萬曆元年題准。凡錦衣衛官旗將軍。及不係世
襲者。照文職例。以三年為率。查無違礙。方許保

結請

誥○十二年題准武職旁枝子孫繼襲祖職俱待三年滿日。在內從兵部。在外從撫按。批允請。誥方冊結送部覆覈。照例題請撰給。若未及三年。或在任犯罪者俱不准。

凡武職有子任在京文職者。成化二十三年。詔封贈依文官例。父職高於子者進原職一階。卑者從子官封。○萬曆元年題准武職子孫見任文職。進階授封者。兵部照例查送膳黃衙門。轉開吏部。行翰林官撰述頒給。○六年議定。職高

於子者仍舊進階。卑者照子文官品級。查武官品同者封贈俱給武軸。前撰述例停止。

凡軍職授

誥之後。子孫不能保守。如遇水火盜賊者。例無重給。

凡土官無封贈。父祖例止與本身。

誥勅。成化以來。該撫按衙門查勘無礙。奏請兵部

覆題亦准封贈。○嘉靖元年奏准長官司長官

勅命。准照土官資格。六品封贈。

正長官作正六品。副從六品。

凡夷官。天順四年奏准野人女直等原授職事。

勅書有齎至告襲者。拘收在部。俟定奪職事後。給新

勅照回。其拘收者。通類年終會官燒燬。

凡加贈。洪武二十六年定。武官歿於王事者。照依生前職事。加贈二等。死於鋒鏑者。照依生前職事。褒贈三等。

大明會典卷之一百二十二

兵部六

大明會典卷之一百二十三

軍務

按諸司職掌。軍務條有開設衛所。整點軍士。今衛所詳載職方司。軍士載職方車駕二司。其職掌舊文存此。而以聲息附總之為軍務云。凡開設衛所。洪武二十六年定。天下要衝及邊方去處。奉

旨。初立衛所。即便行移禮部鑄印作缺。入奏請

旨。除調官員。仍行所在官司開設。撥軍守禦。

詳具職方司城

隍條下

